

Good oll Düütskland?

Moder, so sachtjes krieg ik dat Gefühl, dat wi in en Entwicklungsland leven“, seggt Lissi. „Wo kummst du daar denn up, mien Wicht?“, wunnert Meta sük. „Naja, in ‘t Radio un in ‘t Fernseh’n geven se elke Dag dör, wo vööl Minsken an Corona krank worden of daarmit stürven sünd, un denn kummt de Satz achteran: ‚Man disse Tahlen sünd sük wegen dit of dat nich so recht genau.‘ In en technisk hoog entwickelt Land as Düütskland sünd wi nich in de Laag,



Cornelia
Nath

dat wi Tahlen flink un akkeraat wieder geven. Enige Verwaltens bruken daar noch Faxapparaten för! Also ehrelk, Moder, daar kannst ja gliek en Rieder mit en Postille losstüren.“ Lissi verdreih’t de Ogen.

„Dat is doch blot maandags so, umdat in de Verwaltens saterdags un sönn-dags nich arbeit’t word“, bedaart Meta hör Dochter. „Denn können disse Tahlen ja nich so belangriek wesen, anners würr man de ok an ‘t Wekenenn dörgeven“, verievert sük Lissi. „Un wat hebb ik daarvan, wenn ik en Inzidenzweert kenn, de blot ruugweg gelt? Disse Anbederee van de Tahlen lenkt daar doch blot van of, dat wi de Pandemie nich in d’ Greep hebben. Könen wi de, de swaar krank worden, all versörge of nich, dat is doch de Fraag. Daar word rumorganiseert as mall, man nix löppt so as dat sull.“

Nu vertellt Meta: „Naber Hinni harr lest Week en Termin to impfen, man he

KOLUMNE

Moin, Moin
Schrievers Sprak
allerbest moje
Pläseer **Vertellsel** hoop
Smüstern

Platt maakt

hett en Verkolleree kregen un kunn daar nich hen. Do hett Gerta, sien Froo, versöcht, de Termin per Telefoon oftoseggen, un daar weer still besett. Se is einfach nich dörkamen. Dat harren s’ würrelk beter organiseren kunn’t mit disse hete Drahd för de Impfterminen.“

„Waarum hebben de beid de Termin denn nich mit en Mail upseggt?“, fraagt Lissi. „Umdat in de Breev van dat Ministerium ut Hannover keen Mailadress angeven weer. Daar stunn blot en Telefoonnummer“, seggt Meta. „Wat?“ – Lissi kann dat bold nich faten. „Een Telefoonnummer för heel Nedersassen? Ik segg ja: in Düütskland leven wi elektronisk in ‘t Middeloller. Denk maal an all de Funklocken! In anner Lannen kannst du noch in de leste Pampa mit ‘t Mobjeltje telefoneren of googeln, hier in dat dicht bewohnte Düütskland kummst du nich maal dör de Lümbörger Heid.“

„Man willen se doch nu en Bült Geld för dat Digitaliseren utgeven“, meent Meta. „Ja“, nickkoppt Lissi, „dann kriegen de Scholen noch mehr Tablets schunken un nüms kann daar recht mit umgahn. Of wi kriegen noch en paar Corona-Apps, de Sekerheidsgaten hebben.“ Lissi kickt weer na boven. „Enerwaars mutten se ja anfangen“, seggt Meta, „un nu gifft eerst en Koppke Tee.“